

欽定剿平粵匪方略

欽定勦平粵匪方略卷十三 壬子年

五月初一日辛亥 鄒鳴鶴奏言此次逆匪突至桂

林城下官民協力齊心士卒爭先用命爲時歷  
三十三日水陸經二十四戰在事各文武均能  
奮不顧身竭力堵勦茲擇其尤爲出力者覈實  
開單懇

恩鼓勵奏入

上諭內閣曰本年粵西逆匪攻撲省城曾經降旨令賽尙阿鄒鳴鶴於賊匪解圍後將出力人等覈實保奏茲據鄒鳴鶴具奏朕詳加披閱人數太多過於旨濫且此次圍城賊衆雖經疊次攻擊並未大受懲創仍復全數北竄豈得以郡城圍解視爲奇功鄒鳴鶴所稱擊退賊匪殊屬失實惟念該文武員弁等保守城池一月之久亦未可沒其微勞著賽尙阿將單片內

所開各員逐一確查覈實酌獎並著勞崇光一體查覈不得任意濫保致滋虛冒

初二日壬子程喬采奏言現聞該逆轟陷全州據

馬據船水陸並進已距楚粵交界之黃沙河僅二十餘里惟有厚集多兵齊心會剿或可化險爲夷合無仰懇

聖恩飭令廣西撫臣迅將提臣余萬清原帶赴粵援兵

除帶回二百名尙有一千八百名又上年調撥楚省防兵二千名一併星夜趕由閩道回南以資調遣

程喬采又奏言全州已失該匪愈肆狼狽儻竟竄及楚疆則長沙不免震動合無仰懇

天恩備念省垣要地飭令江西撫臣酌撥精兵二千名星夜來南以保地方而安衆志儻該逆並不北

竄或能迅挫兇鋒長沙似可無虞臣一面奏

聞一面飛咨截止以免糜費奏入

上命軍機大臣傳諭程喬采駱秉章曰全州失守賊匪現近楚疆湖南民情浮動衡永一帶尤會匪充斥之地難保不暗與勾結該督等務當嚴飭地方官密爲查拏豫防土匪乘閒竊發全州與湖南水陸兼通水路尤關緊要或設法阻其行舟或於要害地方密置

兵船暗藏槍礮截擊尾追俾匪船不能順流直下方  
爲萬全儻該逆竄入楚境該督卽飛咨提督率同鎮  
將與粵西帶兵大員同心協力前後夾攻以期一鼓  
殲除所謂四川江西各兵如緩不濟急應如何變通  
調撥之處仍隨時與賽尙阿咨商辦理衡州爲八省  
要路該督駐紮此處正可控制全省阻其入省之路  
並可隨時與賽尙阿咨商機宜儻一有移動則衡永

一帶人心惶恐卽全省亦不免震動所關非細湖北  
與湖南緊連該督仍當隨時知會龔裕嚴拏匪徒豫  
爲防範

上又命軍機大臣傳諭賽尙阿勞崇光曰逆匪攻陷全  
州直趨永州湖南官兵因救援廣西省城陸續調往  
現在程裔采於水陸兩路設防殊覺兵力單薄必須  
廣西兵勇兩面夾擊該大臣前奏擬由省城酌量移



晉前進現值楚邊緊要著卽迅速移營就近調度廣  
西省賊氛甫退防剿事宜不可稍懈勞崇光已授  
廣西巡撫責無旁貸著卽通盤籌畫相度情形或應  
留省督剿或應出省應援隨時與賽尙阿商辦合力  
同心以期共濟該大臣仍飛飭各路將弁督帶兵勇  
或由間道繞越賊前或跟蹤緊追使賊無暇喘息總  
以力遏賊鋒勿致蔓延楚境是爲至要徐廣縉如抵

粵西卽可專辦勦捕事宜該大臣此時應以楚境爲重若能乘賊分竄兩路痛勦仍可轉敗爲功懷之勉之

上又命軍機大臣傳諭徐廣縉葉名琛曰楚粵賊勢益張徐廣縉奉到前次諭旨諒已督兵前進此時賽尙阿已督兵由桂林馳赴楚境勞崇光已補授廣西巡撫該督到粵西後卽專辦該省勦捕事宜湖南兵勇

多已調赴廣西現經程喬采咨調恐一時不能趕回  
衡永之間萬分緊要如能選派勁兵取道南雄州由  
郴桂繞出永州據賊前路迎頭截擊亦出奇制勝之  
策是否可行酌量調度

上又命軍機大臣傳諭徐澤醇陸元娘曰前因湖南防  
剿緊要已有旨將四川兵二千名令程喬采酌量催  
調赴楚仍著徐澤醇卽派帶兵將弁速赴湖南聽候

程喬采調遣並著陸元煊於提鎮各標內挑選精兵二千名遴派得力將弁妥備軍裝器械馳往湖南協力防堵

上諭內閣曰廣西全州被逆匪轟陷賊蹤距楚界甚近自應厚集兵力以期堵剿兼施著賽尙阿勞崇光迅將前赴廣西援剿之楚兵酌量撤回湖南俾資調遣並迅飭綏靖鎮總兵和春及廣西各路兵勇兼程前

進與湖南弁兵合力夾擊程喬采惟當嚴飭在事文武實力巡防儻賊蹤竄近卽令迎頭奮擊以遏賊氛  
同日駱秉章奏言粵匪竄近楚邊湖南辦理防堵亟須籌添經費願懇

天恩飭部在於鄰近各省籌撥餉銀五十萬兩迅速委員解楚交收俾資接濟奏入得

旨戶部速議具奏旋經戶部議覆遵撥陝西河南等省

銀五十萬兩徑解湖南

上從之

初六日丙辰賽尙阿奏言接和春稟該逆於全州

城下開挖地道安放火藥十六日巳刻火發城裂賊衆一擁而入該兵丁乘亂逃出城中文武各官不知存亡旋據續報十八日早探得該逆全數竄出州城勢欲由河順流北竄和春親督

各兵勇用劈山礮向河流釘塞處所徹夜轟打  
又密令弁兵潛燒賊船二隻該逆未能卽竄十  
九日黎明仍令兵勇分路攻剿賊船二百餘隻  
已在蓑衣渡江心泊如營壘兩岸安設大礮我  
兵一進賊槍礮如雨和春親督兵勇四路奮攻  
該逆亦死力拒敵數時之久賊匪情形頗爲迫  
蹙臣惟有竭盡心力嚴飭將士激發天良並令

和春督率諸軍設法圍攻一面飛咨湖廣督臣程喬采速飭楚省防兵迎前堵截扼其竄突前後夾擊庶匪勢不至滋蔓

賽尙阿又奏言據和春劉長清等續報賊又竄逃各兵亟須追擊乘機勦滅請將留省楚兵仍卽全數撥給以資得力並請將粵西本省兵一千四百名撥回防守省城一轉移閒於防勦兩



得其宜臣復與撫臣商酌並告以臣現尙在省  
所帶親兵千餘城外尙有東潮等勇卽使土匪  
潛發亦尙足資鎮壓詎該撫遣同榮之子向繼  
雄回稱仍以省城緊要城外各勇多不足恃必  
須粵兵回至省城始允將留省楚兵撥往計粵  
兵由全至省然後楚兵由省赴全往返動須旬  
日軍情利害勢爭頃刻豈容如此稽延臣萬不

得已惟有飭令和春等仍將粵兵帶往追勦毋庸專俟此項楚兵應用鄒鳴鶴一意阻撓全不通籌大局似此恇怯情形實不足當封疆重任臣當此事機萬分喫緊之際動多牽掣不敢不據實直陳

賽尙阿又奏言大營親隨文武各員相隨年餘崎嶇艱險倍極勤勞臣當此軍務未竣曷敢爲

該員等論功請賞惟該員等辛勤日久實爲得力未忍掩其勞勩仰求

皇上天恩准加獎勵奏入

上命軍機大臣傳諭賽尙阿曰逆匪圍攻全州暗用地雷將州城轟陷已據程喬采奏到曾諭令該大臣嚴飭各路將弁跟蹤追剿茲據賽尙阿奏該匪連日被剿乘夜逃竄情形雖似窮蹙而現在賊蹤已徧近湖

南道州永州等處勢仍猖獗和春等帶兵追捕能否  
得力著卽嚴飭各路分督兵勇合力攻截並飛咨程  
喬采兩路夾攻迎頭堵擊以期轉敗爲功勞崇光前  
往興安等處昨已授爲廣西巡撫更屬責無旁貸該  
撫前在南太用兵尙有謀略正可隨時幫同賽尙阿  
籌畫一切毋致再有疏虞至該大臣酌保親隨文武  
各員該員等辛勤一載自不當沒其微勞惟當此城

池失陷之時忽然論功行賞殊不足以服人心已將  
原奏摺單暫存軍機處俟大獲勝仗再行分別加恩  
賽尙阿又奏言上年所調川兵係於督標川東  
兩處挑撥到營以來打仗不甚得力黔兵亦多  
疲乏相應請

旨飭下四川省挑備松潘建昌兩鎮兵各一千名河南  
雲南兩省兵各挑備一千名如有需用卽一面

奏

聞一面飛調到營以資得力奏入

上命軍機大臣傳諭徐澤醇李德曰前已有旨著徐澤醇將前調四川兵二千名飭令迅赴湖南著再於松潘建昌兩鎮內挑選精兵各一千名並著李德於提鎮各標內挑選精兵一千名各備軍裝器械並派得力將弁管帶聽候調撥

上諭內閣曰前據程喬采奏廣西逆匪北竄探聞全州失守茲據賽尙阿奏稱全州城內文武紳民嬰城固守已逾旬日詎於四月十六日被逆匪用火藥轟裂城垣以致失守該大臣統領全師而月之間興安全州兩城被賊攻陷雖由陽朔抵省趕緊派兵接應究未能先事籌防實難辭咎賽尙阿著交部議處已革廣西巡撫鄒鳴鶴身任封圻全省皆其專責若於省

城解圍賊衆北竄之際迅速派撥重兵追剿何至兩  
城先後被陷現據賽尙阿叅奏貽誤事機姑念守護  
省城尙有微勞業經革職免其治罪仍著賽尙阿查  
明帶兵大員是否援剿不力據實具奏現在賊匪竄  
近湖南該大臣已分飭水陸各路防剿兼施著卽與  
勞崇光悉心籌畫嚴飭在事文武督飭兵勇竭力堵  
禦以遏逆匪北竄之路仍隨時咨會程喬采合力籌



辦毋稍延誤

賽尙阿又奏言總兵劉長清業經臣飭令卽日  
帶領廣西四川官兵追勦賊匪所有廣西提督  
篆務未便再令署理查提督向榮旣經撫臣鄒  
鳴鶴奏留守禦省垣臣卽行知向榮令其派員  
前往全州將印齎回省城接領任事奏入

上是之

初八日

戊午

程喬采奏言查探粵匪自攻陷全州

後由小路偷越於四月二十二日竄至永州城  
外旋竄零陵縣屬之雙排地方係通道州大路  
雖有提臣余萬清駐彼堵禦兵力尙單適綏靖  
鎮總兵和春由太平鋪統帶兵勇萬餘追至業  
經議定分爲兩路一由甯遠馳赴道州堵截一  
由雙排跟蹤尾追以期掃數殲滅

程喬采又奏言湖南省兵力本單前據紳士紛紛籲懇添兵已請調江西官兵二千名爲防護省城之用而攻勦尙屬不敷惟有懇

恩飭下賽尙阿鄒鳴鶴先將粵西兩次抽撥楚南防兵悉數撤回再將前調征兵以次遣回歸伍並請將徵調湖北官兵一併全行遣回藉資策應兩省藩庫均已支絀異常湖南現有軍需應請

飭部籌撥餉銀並准先將截留粵西解項暫行借動以  
應急需楚省兵旣單薄卽和春帶來兵勇恐亦  
不敷且事權亦難歸一可否

飭令賽尙阿帶領各兵移紮南省庶遣將出師得以全  
操勝算可期及早蒞事

程喬采又奏言准賽尙阿密函探得賊在全州  
擄船二百餘隻有無論全州攻得與否卽欲直

撲湘漢之謠萬一衡湘被其偷越關繫匪輕又  
准湖北撫臣龔裕飛咨四月十八日省城地方  
揭獲僞示二紙填寫總理軍機鎮守湖北地方  
大司寇郭僞銜內有天德年號現在密訪查拏  
各等因臣兼圻責重晝夜籌思似未便株守一  
隅已將衡州防堵並所調官兵逐一布置周妥  
卽於四月二十五日兼程進省與撫臣暨各司

道等會商籌辦以固根本而定人心奏入

上命軍機大臣傳諭程喬采曰賊匪攻陷全州以後膽  
敢直竄永州逼近城垣猖獗已極雖經大獲勝仗而  
該匪既有直達湘漢之謠更恐衡永一帶所在會匪  
被其嘯聚且郴州戕官案內漏網餘匪亦恐乘機勾  
結况湖北省城獲有偽示則該匪耳目心腹散置兩  
楚正復不少事機稍涉遲鈍必至勢若燎原該督折

同長沙居中調度衡永兩郡雖有提鎮統兵嚴守而水陸閒道旣多處處均須防堵切勿顧此失彼致墮奸計前經兩次降旨令四川豫備精兵二千名又松潘建昌二鎮兵二千名候調如需用孔亟卽著該督迅咨徐澤醇飛調至江西兵二千名想已催調起程到後著察看情形妥爲布置各路所解廣西軍餉准其截留湖南備用除前經該督請撥帑銀五十萬兩

已由戶部速籌迅解外現令該部寬爲儲備該督仍當樽節動用並督飭在事文武員弁協力同心奮勇勦捕乘此賊鋒大挫官軍得手之時一鼓作氣蕩除羣醜該逆聲東擊西是其慣技所稱欲撲長沙或卽令我應接不暇爲窺伺衡永之計必須兼顧周到仍當示以鎮靜以安民心

上又命軍機大臣傳諭賽尙阿曰前因楚邊緊要飭令



賽尙阿迅速移營就近調度現在賊匪竄至零陵縣屬之雙排地方恐由道州一帶肆行竄擾程喬采已回駐長沙爲防護省城之計著賽尙阿迅卽統帶大兵馳赴湖南扼要駐紮鎮將中孰應留粵孰宜赴楚自行酌量調遣向榮前爲鄒鳴鶴留駐省垣此次賽尙阿移營湖南是否仍需向榮前往抑或令其專辦廣西軍務均由該大臣酌度辦理

上諭內閣曰粵西賊匪自攻陷全州之後潛由小路偷越四月二十二日竄至永州城外旋竄零陵縣屬之雙排地方現在余萬清和春分路進剿程喬采折回省城居中調度著賽尙阿迅卽馳赴楚境扼要駐紮毋稍遲誤所需軍餉著戶部寬爲籌備朕思全楚人心素稱強固當茲賊氛肆擾在籍官紳士庶諒必志切同仇咸深義憤著程喬采徧行曉諭如有紳民團

練自固藩籬互相保衛殺賊立功者卽行破格保奏  
候朕施恩其有被賊偪脅自拔來歸或搜獲奸細殲  
斃賊匪者並可寬其已往予以自新現復續調各省  
精兵馳往協剿蠢茲醜類計可速就殲除該大臣督  
撫提鎮等其各協力同心以副委任

臣等謹案禦侮之道莫如衆志成城軍興以  
來雖一鄉一邑不乏互相保衛殺賊立功之

士而湖湘扼全楚之勝興師蕩寇爲天下先  
伏讀

諭旨飭在籍官紳士庶舉行團練其時賊匪初入永州  
全楚尙未騷動也乃

宸謨垂訓及此所以作士氣勵將才者至深遠矣至崔  
苻肆擾愚民身陷賊中原非甘心從逆

朝廷寬其既往咸與維新敬繹

聖諭不愈免

皇仁之浩蕩哉

同日

上諭內閣曰前任湖北巡撫羅繞典著馳驛前往湖南  
幫同欽差大臣賽尙阿湖廣總督程喬采辦理軍務

初十日庚申程喬采駱秉章奏言探聞該匪竄至

道州於四月二十五日攻破州城綏靖鎮總兵

和春先已帶兵分投迎截計可趕到等情查該  
匪自桂林夜遁後甫經浚旬卽攻陷興全迨至  
擄掠一空復行他竄其猖獗情形本未十分窮  
蹙嗣雖經永州擊退一挫其鋒而人數尙屬不  
少但道州距永有一百八十里之遙究係何日  
被圍如何攻破是否由永竄往抑係另股匪徒  
均未據該道府等稟及且提臣余萬清自粵馳

回駐紮道州防守係其專責昨准提臣鮑起豹  
咨稱四日未通文報而臣等於四月三十日曾  
接余萬清二十四日來咨據稱逆匪披猖下游  
喫重應卽帶兵趕赴衡州兼護長沙省會並添  
調宜章臨武桂陽各營官兵爲迎頭截剿之計  
而賊與道州逼近何以遠慮下游已屬不知緩  
急且宜臨各縣向多土匪亟緊接粵東存兵無

多何得擅調當卽飛咨阻止囑其仍在道州設法嚴防詎該提臣發咨之次日道州卽已失守而彼時有無賊匪咨內亦未提及竟不知該提臣現在何處此中顯有趨避該提臣係賽尙阿派令回楚防堵之員何以荒唐至此查道州與永明甯遠新田等縣處處相通雖經和春帶兵分投攔阻但由甯遠而至常甯則與衡州切近



若由水路直下又可回竄永州均屬萬分喫緊  
臣程喬采未敢稍事遲誤拜摺後卽行由陸起  
程星夜折回衡郡嚴密督防至道州被圍失守  
及余萬清究往何處並失防文武各員情形俟  
查明分別辦理

程喬采駱秉章又奏言昨臣等因省垣緊要已  
調鎮守綏靖永綏乾州各標兵四百名道標練

勇一百名苗兵一千名以資守禦今蒙

聖諭飭將四川選備兵二千名酌量調用值茲逆氛肆

竄自應趕緊徵調臣等已遵照飛咨但有兵無

將仍恐調度乖方現在楚省除提臣鮑起豹駐

紮永城外餘僅永州鎮總兵孫應照一員膂力

又不足恃此外將備斷難總統重兵相應仰懇

天恩飭令大學士臣賽尙阿選派有勇有謀之鎮將數

員星速來南以資統勦一面另派精兵數千名  
倍道赴衡一俟該匪竄及卽行迎勦以爲前後  
夾攻之計奏入

上命軍機大臣傳諭程喬采曰該督前奏賊由永州竄  
至雙排係通道州大路余萬清在彼駐紮兵力尙單  
和春帶兵萬餘跟蹤趕至議分兩路一由甯遠馳赴  
道州堵截是道州已有和春帶到之兵何至遽爾失

守余萬清係在道州防堵之員何以率稱下游喫重  
徑赴衡州且該提督發咨次日州城已陷豈賊衆麕  
至先期一無聞見該州城有無準備文武各官有無  
懼怯畏避情事現在下落如何該督先已折回省城  
茲又前赴衡州省垣重地是否布置妥協衡永兩郡  
現俱喫重如何分派大員帶兵堵禦孫應照是否得  
力其和春分派雙排追兵是否足資策應和春現在

何處攻勦所調四川江西官兵仍恐緩不濟急賽尙  
阿接奉前旨想已調回湖南征兵防兵並湖北官兵  
著該督卽與該大臣妥籌分撥嚴密布置現在賊夥  
是否盤踞道州抑係分股搶掠均應處處設防不可  
顧此失彼其由甯遠常甯至衡州之路尤須豫備迎  
頭截擊不可更有疏虞

上又命軍機大臣傳諭賽尙阿曰現在衡永一帶防勦

十分緊急賽尙阿接奉前旨諒已帶領得力鎮將統帥大兵前往扼要駐紮迅籌勦捕向榮曾任湖南提督一切情形尙稱熟悉現在病勢如何應否調往湖南協同勦辦卽著賽尙阿酌量飭知總期兼權熟計毋誤事機

上諭內閣曰粵匪竄至道州於四月二十五日攻破州城程喬采駱秉章未能先事豫防咎無可辭均著交

部議處該督現已由省折回衡州堵禦並著賽尙阿  
迅速馳赴湖南督兵勦辦提督余萬清自粵馳回道  
州防守何以州城致被賊陷著賽尙阿程喬采查明  
據實叅奏其道州失守情形並文武各官下落一併  
確查具奏

同日湖北巡撫龔裕奏言前此粵匪潰竄警信  
頻傳臣日與藩臬兩司籌商防務晝夜焦慮寢

食難安以致舊患肝氣復發目眩頭暈甚形委頓巡撫責任綦重又當邊境戒嚴臣以病軀不諳軍旅若此時稍存瞻顧隱飾直待不能辦事失誤機宜再行自陳是直情同欺罔負罪益深可否仰懇

天恩俯准臣開缺調理奏入

上諭內閣曰冀裕身膺疆寄當此軍務防堵喫緊之際



應如何殫竭血誠以圖報效乃因粵匪奔竄漸入楚境輒以肝氣舊病藉辭引退實屬辜恩大負委任龔裕著交部嚴加議處新任巡撫常大滄未到以前所有防堵一切事宜仍責成龔裕帶罪籌辦儘有疏虞朕惟執法嚴懲不能寬貸

十一日 辛酉 吳文鎔張亮基奏言滇黔邊界多與

粵鄰防堵不容刻懈因時差人赴粵西大營一

帶偵探賊情臣等細加訪察似係提督向榮誇  
詐冒功飾智欺人以致軍心不能帖服奮興卽  
如賊之由新墟竄入永安也向榮與巴清德營  
盤被劫所有軍火礮械隨營糧餉兵士衣裝全  
行遺失向榮首先遁入平南託言保守縣城其  
失機敗衄之罪已無可道蒙

皇上不殺之恩許其帶罪立功乃向榮復託病偃蹇月

餘不出坐視永安百姓之塗炭而漠然不以介意經賽尙阿再四強之始肯赴軍營視事又令其總統北路全軍乃向榮徒爲大言一無實際屢屢自表軍令嚴明將士用命並未聞破一賊營擒一賊目而我軍損將折兵不一而足伊所稟報勝仗非曰轟斃賊匪多名卽曰奪獲賊械多件祇虛擬而絕無實數也且賊棄永安數日

向榮始統兵前追又不審機宜猝遇賊伏致大  
兵潰散傷亡鎮將四員聞向榮祇帶殘兵數十  
名一晝夜奔馳二百餘里躡入省城自保反捏  
稱統帶大兵間道赴援似此有虛名而無實用  
之人諒未足倚以辦賊也臣等聞軍營在事諸  
人文員中惟藩司勞崇光一人有膽略有血性  
武員中惟副都統烏蘭泰一人有膽略有血性

三才圖會卷十三  
三六

儻重其事權俾與賽尙阿相助爲理或可漸收  
實效奏入

上命軍機大臣傳諭賽尙阿徐廣縉曰向榮經朕屢次  
棄瑕錄用宜如何感激朕恩力圖報效若如吳文鎔  
等摺內所拏各情種種辜恩溺職實屬大負委任著  
賽尙阿秉公確覈據實叅奏徐廣縉抵廣西後留心  
訪察如果屬實亦卽叅奏毋稍含混

吳文鎔又奏言臣溯查嘉慶年開川楚教匪滋事經臣明亮臣德楞泰奏請堅壁清野築堡禦賊其時議者因恐費繁滋擾罷未舉行嗣於嘉慶六年經臣額勒登保復舉前說奏請施行卒以此收效將賊匪蕩平臣查現在粵西情事頗與棍類可否請

旨飭下廣西撫臣飭屬實力舉行惟此事必須府州縣

得有賢員方能收效儻有司不得其人無誠實  
愛民之心與百姓聯爲一體或任令差保藉端  
滋擾則無益而有損或奉行故事出示曉諭百  
姓而以空稟搪塞上司則亦有名無實法爲至  
善事在人爲伏乞

聖鑒採擇施行奏八

上命軍機大臣傳諭程喬采龔裕略秉章曰上年粵匪

滋事疊經有人條奏堅壁清野之議飭令實力舉行  
現在賊竄楚境已降旨飭令該督撫等勸諭紳民團  
練自相保衛著程喬采會同龔裕略秉章查照吳文  
鎬所奏各就地方體察情形飭屬認真試辦總須隨  
地制宜方爲妥善常大瀉張亮基到任後並著接續  
辦理

十四日  
甲子龔裕奏言接督臣程喬采來函逆匪



撲湖南永州雖經官兵擊退詎該逆匪轉竄道  
州竟將州城攻陷現在賊勢臨張衡州以下水  
面甚寬阻遏爲難現在酌調宜施及較近各營  
官兵一千名遴委妥員管帶交台湧分撥防堵  
並咨明督臣程喬采湖南撫臣駱秉章迅派官  
兵在於南省臨湘縣之城陵磯及緊要口隘認  
眞堵截至湖北武昌省城由洞庭大江直下僅

止五百餘里省城對岸之漢口鎮財貨聚集爲  
賊覬覦更須添調官兵密爲準備應請

旨飭下河南撫臣酌撥精兵二千名陝西撫臣酌撥精  
兵一千名選派得力參遊等官管帶來楚以資  
調遣提臣博勒恭武額請

陛見已奉

俞允尙未交卸應請暫留湖北俟防堵事竣再行赴京

藩庫銀項支絀此時豫備防兵口糧及軍需一切經費實在無款可籌並請

飭下戶部迅賜酌撥銀三十萬兩解赴湖北以濟要需

奏入

上命軍機大臣傳諭程喬采龔裕曰粵西逆匪竄入楚境湖北與湖南接壤必應豫籌防堵據龔裕奏已調宜施各營兵一千名派員管帶交將軍台湧分派嚴

防並咨明程喬采等迅派官兵堵截卽著嚴飭兩省帶兵文武於水陸各要隘認真堵截無任賊匪闖入尤須察看地勢扼要設防前已有旨令提督博勒恭武暫緩來京陛見所有湖北防堵事宜著與台湧會同地方妥爲布置現當防堵喫緊之時龔裕雖經革職豈能置身事外若不激發天良意存諉卸設有疏虞朕必重治其罪程喬采身任兼圻責無旁貸務當

通鑑全局不可顧此失彼致誤事機

上又命軍機大臣傳諭舒興阿張祥河李德曰前因粵匪北竄已有旨令李德挑選精兵一千名遴派得力將弁管帶聽候調撥著卽催令迅速前赴湖北交該督撫等酌量分派防堵並著舒興阿張祥河於陝西省提鎮各標內挑選精兵二千名派委得力鎮將大員妥備軍裝器械馳赴湖北協力防堵

上諭內閣曰龔裕奏籌辦防堵粵匪請飭部酌撥銀三十萬兩解赴湖北以濟要需著戶部速議其奏旋經戶部議覆遵於安徽江甯蘇州三藩庫內籌解銀三十萬兩迅解湖北

上從之

同日

上諭內閣曰自廣西辦理軍務以來失事獲咎人員閒

有因該省原奏聲明留營效力者朕念軍營用人難  
拘常格姑准留營以資差遣獲咎各員果能知感知  
懼力圖報稱原不必以一眚概從擯棄若竟不知愧  
奮遇事退縮軍營中亦安賴此劣員爲耶著欽差大  
臣暨各督撫等認真查覈不得濫請留營以爲開復  
地步並將從前准留各員詳加察看分別奏請留撤  
其失守城池各員尤當嚴查照例叅奏治罪斷不准

任聽稟報飾詞稍存姑息至臨事告病尤屬心存規避現在楚粵兩省防剿喫緊之際該地方文武各員有告病開缺者著照從前海疆告病例交吏兵兩部隨時存記俟該員病痊引見時聲明請旨

同日吏部奏言遵議冀裕處分奏入

上諭內閣曰冀裕著照部議革職仍遵前旨帶罪籌辦湖北防堵事宜俟新任巡撫常大瀉到任後再行交



卸

吏部又奏言遵議賽尙阿處分奏入得

旨賽尙阿著加恩改爲降四級留任

十七日丁卯賽尙阿奏言逆賊於二十一日至距

湖南永州府三十里之水西橋由和春飛咨湖南提督鮑起豹及永州鎮總兵孫應照嚴密防剿二十三日行抵黃田鋪探得賊至永州城外

河西屯紮二十四日復由東南竄往道州一路  
和春馳抵永州賊已竄走又值大雨暫紮城外  
河岸山梁卽日拔營跟蹤追剿臣因賊蹤未定  
情形日有變遷一經移動恐於控制調撥轉不  
相宜祇可暫駐省城督辦查逆匪自省城北竄  
時氛燄已覺稍戢及至興全又肆鴟張賴和春  
等兵到痛加剿擊斬馘甚多該逆懼爲大軍圍

偏退出州城擄船二百餘隻復欲順流駛竄臣  
聞信深切焦慮屢次飛移程喬采嚴密豫籌卽  
據該督函稱楚粵界連各要道俱已加意嚴防  
惟以兵分見單囑將余萬清所帶楚兵仍令帶  
回時以此項楚兵已由和春帶赴楚境追剿與  
余萬清帶領回楚無異目前賊雖竄近道州幸  
其匪黨在全州被官軍剿創斃其大頭目蕭潮

潰該匪與楊秀青同爲洪秀泉左輔右弼謹將  
供詞鈔錄恭呈

御覽其馮雲山羅亞旺受傷險重勢亦必死惟賊中邪  
術能用水法取子治傷奇效或馮雲山等藉此  
苟延賊中自逆首洪秀泉以下猶有渠魁楊秀  
青韋政等數人或亦各生疑懼且賊在全州大  
挫旣爲河路釘樁不能遂其順流而下之志察

其焚棄舟船輜重婦女銀兩逃走情形似實較前窮蹙湖南永州防禦謹嚴賊至該郡又不能攻追兵甫近賊卽蒼黃奔竄臣密授和春機宜令於奮迅之中倍加精細乘賊喘息未定出奇制勝或可一鼓成功劉長清所帶粵西本省官兵先經臣飭令帶領踰境追剿現據勞崇光稟明大兵赴楚足敷剿辦恐賊乘虛回竄或有措

手不及之處令該鎮仍將此項粵兵一千一百名帶回省城俾臣隨時調遣並令續由省城派往楚兵八百名卽由副將鄧紹良管帶隨後探賊跟追奏入

上命軍機大臣傳諭賽尙阿曰據賽尙阿奏稱賊蹤未定一經移動恐於控制調撥轉不相宜並將劉長清調回粵西省城以防賊匪回竄等語葉名琛接辦凌

十八殺匪徐廣縉計日可到廣西刻下衡永一帶防  
剿十分緊急饒尚阿著俟徐廣縉到後仍遵前旨迅  
卽馳赴湖南扼要駐紮與程喬采合力剿賊劉長清  
打仗素稱得力如賊匪不致回竄該大臣卽酌量帶  
往楚南軍營以資調遣勞崇光現在邊界各處嚴密  
巡防楚粵兩省情形皆所熟悉著卽通盤籌畫隨時  
知會程喬采併力夾攻或派勁兵越境追剿毋誤事

機賊首蕭潮潰是否實係職斃馮雲山羅亞旺是否受傷仍著偵查確實具奏

上又命軍機大臣傳諭程喬采曰賊匪破陷道州不卽屯踞勢必向他處竄擾程喬采現已還駐衡州居中調度該督統轄兩省責無旁貸所有和春等統帶追剿之兵勇合共一萬五千餘名著卽相機調遣督飭進剿毋令紛竄蔓延衡州爲全楚門戶該督現在扼



要駐守總當隨時偵探設法勦堵防其陸路翻山水  
路順流肆擾他處是爲至要

同日

上諭內閣曰前有旨令賽尙阿迅赴湖南籌辦軍務其  
未到以前著程喬采督辦防勦所有軍營提鎮以下  
帶兵大員統歸節制

二十二日

壬申

荊州將軍台湧奏言接撫臣龔裕

來函逆匪攻撲湖南永州雖經官兵擊退而轉  
竄道州州城被陷現在賊勢颯張急應防守茲  
臣選派滿營官兵一千六十餘員名於五月十  
三日起程星夜馳往荊州所屬石首監利兩縣  
各要隘酌量設防奏入

上命軍機大臣傳諭台湧曰湖北與湖南連境前已諭  
令龔裕隨時與台湧會商布置茲據該將軍奏稱卽

日馳往荊州所屬石首監利兩縣將所帶滿營官兵  
一千六十餘員名擇要設防所有該處各緊要隘口  
卽責成該將軍嚴密防守

二十三日

癸酉

程喬采奏言粵匪自竄踞道州後

已於水南門紮營一座爲逆首屯住之所又於  
斧子嶺洪家村何家村柑溪鋪百嶺頭各要隘  
均紮賊營業經賽尙阿派委總兵和春藩司勞

崇光會督總兵常祿秦定三李瑞經文岱王錦  
繡副將鄧紹良參將德亮復委江忠源並張國  
樑帶領湖北湖南雲南貴州廣東各官兵暨楚  
勇捷勇通共一萬五千餘名先後來楚並經提  
臣鮑起豹派令遊擊傅振邦帶兵六百名赴道  
會剿旋據和春稟報五月初五日晚趕將浮橋  
搭齊派令官兵分爲中後左右四路齊進並令

後路之四川兵在於何家村山後埋伏以爲後  
應初六日寅刻同抵五里亭偏近賊巢楚捷各  
勇施放槍礮誘賊出敵約半時許該匪分三路  
撲來每路約二千餘人勢極兇猛總兵常祿等  
分帶兵勇攔頭迎勦我兵槍礮齊施斃賊多名  
該匪開礮回攻我兵奮力向前鏖戰數時該匪  
先猶死力抗拒繼則紛紛倒地仍敢以槍礮回

擊我兵奮勇齊追突於嶺右衝出伏賊二三百  
人攔腰接仗又經後路官兵趕上極力擊退該  
匪紛繞嶺後敗走查粵匪雖踞道州而竄入楚  
境後已兩摧其兇燄惟亟須設法速殲方不至  
復形猖獗藩司勞崇光現駐永州臣自當妥與  
籌商剋期進剿奏入

上命軍機大臣傳諭程喬采勞崇光曰粵匪竄越楚界

盤踞孤城現在我軍兵勇共有一萬五千餘名和春  
向稱奮勇勞崇光前在廣西辦理南太一帶匪徒調  
度尙合機宜提督鮑起豹現亦督兵會剿務當乘賊  
營未定之際併力進攻兵貴神速斷不可稍涉遷延  
且聞道州紳民激於義憤團練勦賊正可設計約會  
作爲內應聚而殲旃萬勿失此事機致貽後悔道州  
處楚粵之交賊匪北竄可撲永州南竄卽回粵境勞

崇光係廣西巡撫越境勦賊尤當兼顧粵疆以防逆  
匪回竄之路賽尙阿到楚尙需時日所有現在防勦  
事宜卽責成程喬采勞崇光會商妥辦該督等其同  
心戮力迅掃賊氛

上諭內閣曰逆賊竄踞道州現在勢成孤立正可乘此  
機會併力進攻勞崇光已移紮永州策應較近和春  
等又帶到兵勇一萬五千餘名足資會勦著程喬采



督飭文武將弁激勵紳民與勞崇光合力圍攻務期  
一鼓蕩平以靖妖氛而綏疆圉

程喬采又奏言據署道州知州王揆一稟稱四  
月二十三、四等日探聞賊至雙排面懇余萬清  
妥爲布置二十五日辰刻賊竄至莊水塘離城  
僅四十餘里余萬清卽以帶兵堵剿爲詞意欲  
遁去經該署州催促上城隨同余萬清巡查四

門賊匪旋由西北一帶而來城西北角本係遊擊羅我謙派兵防守其時祇有甫經調到之千總唐得升在彼該署州卽囑乘勢攻撲一面飛請余萬清督禦詎至西門余萬清業已出城並將防兵帶去適有數賊踵至該署州督率丁役上前被賊打傷左手腕當卽跳城而去欲將余萬清挽回乃賊匪旋各入城該署州愧憤投河

經地方紳民撈救又欲自刎亦被將刀奪棄同  
聲願起義勇爲官收復城池等情臣正查辦聞  
該提臣隨來衡州堅求一見臣當面加斥責該  
提臣亦自認糊塗惟總以欲往蛇皮渡堵截爲  
詞查余萬清旣駐道州防堵係其專責兵力雖  
單亦應固守城池况大兵業已跟追猶可爲內  
外夾攻之計該提臣輒卽帶兵而出已失機宜

而前准來咨稱欲起來衝郡防護長沙臣已斥  
其舍近求遠今復稱往蛇皮渡堵截並無來衝  
之語尤屬前後兩歧實不免有棄城而逃捏詞  
支飾情事至署道州王揆一職膺守土未能先  
事豫防迨至賊匪撲城又以出城挽留提臣致  
州城竟爲匪踞遊擊瞿我謙亦係駐守州城之  
員今亦不知去向均出情理之外自應分別嚴

究以肅軍政相應請

旨將丁憂留防之提臣余萬清暨永州鎮右營遊擊瞿  
我謙一併革職拏問署道州知州王揆一先行  
革職交賽尙阿嚴審辦理再余萬清在江華防  
堵已將兩年先聞其情形熟悉辦事精細前經  
臣與駱秉章密保今如此恇怯無能實屬辜負  
天恩是臣與駱秉章均屬保奏不實應請交部分別議

處

程喬采又奏言查王揆一失陷城池雖非畏葸  
逃遁究屬職守有乖但據地方紳耆同股義憤  
公願代募鄉勇力圖克復是其民情愛戴素有  
循聲亦可想見可否仰懇

天恩准令該員隨營效力贖罪之處出自

鴻慈奏入

上諭內閣曰前任湖南提督余萬清經程喬采派令帶  
兵防守道州乃逆匪竄入境內輒先棄城而逃又復  
捏辭支飾遊擊瞿我謙亦係駐守州城之員何以不  
知去向余萬清瞿我謙均著革職拏問仍於查拏瞿  
我謙到案時嚴訊逃避情形據實具奏道州知州王  
揆一有守土之責據奏受傷踰城投河遇救各情節  
殊屬支離著一併革職拏問所請將該員留營效力

著不准行現在賽尙阿尙未到楚此案卽交程喬采  
秉公殿審確情按律定擬具奏余萬清係程喬采駱  
秉章奏請留楚之員該督等保舉不實著交部分別  
議處

二十五日乙亥賽尙阿奏言全州地方平日民風

樸厚頗知禮義知州曹燮培等於寇至倉猝時  
躬率士卒同心勦力捍禦十餘晝夜及城陷揮



兵巷戰與城俱亡城中士民等亦各同仇敵愾  
效死危城實屬忠義可嘉相應詳細開列請

旨將全州知州曹燮培等交部從優議卹並將知州曹  
燮培前知州瑞麟參將楊映河等於該州及原  
籍地方建立專祠同時被難各員名一併附祀  
以慰忠魂至全州被陷時總兵劉長清帶兵追  
勦逐日進攻尙無失機惟紮營處所距城尙遠

賊於要路堵守不能前進以致州城陷失文武  
官民慘遭焚殺實屬援勦不力相應請

旨將四川北鎮總兵劉長清卽行革職仍責其帶罪  
勦賊以觀後效奏入

上諭內閣曰逆匪前撲全州官民固守旬餘被賊轟陷  
後仍復盡力巷戰同仇效死致遭屠害極爲慘酷實  
深憫惻全州知州曹燮培升補西隆州知州瑞麟全

州學正農賢托護理全州營參將楊映河署全州營  
西廷汎把總卜有祥候補知縣盧金第候補府經歷  
陳垚寶慶協都司武昌顯護理綏靖鎮標遊擊余連  
陞千總田慶華署千總馬瑞龍署把總盧先振署外  
委孫紹全楊清麒署額外外委田宏義保靖營把總  
黃志林外委楊大賓額外外委龔心仁田宗南鎮筸  
鎮標後營把總韓天興武舉唐殿試生員蔣成龍武

生張以敬文童金建勳生員甯琚幕友祝永文朱福  
坪周希齡楊菱將生員金家駒軍功黃伯彬均著交  
部從優議卹曹燮培瑞麟楊映河等並准於該州及  
原籍地方建立專祠同時被難各員名均著附祀以  
慰忠魂署廣西提督劉長清帶兵追剿正值該匪圍  
攻州城之際如果奮勇前進何難殺賊解圍乃於帶  
兵趕到後紮營過遠爲賊所阻以致州城失陷官民

慘遭荼毒實屬援勦不力劉長清著卽革職責令帶  
罪隨營效力以示懲儆

上又諭內閣曰余萬清以提督大員帶兵分守道州不  
知設法防勦乃於賊匪窺偪州城時輒先出城引避  
並將西門防兵帶出以致州城失陷似此喪心昧良  
開門揖盜實出情理之外著程喬采遵照前旨將已  
革署知州王揆一原稟情形逐一嚴查確實並提余

萬清與王揆一當面對質如果實係棄城逃避著卽按律定擬請旨正法其王揆一踰城投河各情節與已革遊擊瞿我謙有無下落迅卽查訊定擬具奏嗣後統兵大員有臨陣脫逃或託病遷延致誤軍機者著該大臣督撫等一經查明確實卽行據實叅奏請旨正法其參遊以下各員如有逃避畏葸以致失地喪師者著一面奏聞一面卽於軍前正法以肅軍律

不得巧爲開脫致啟徇縱之漸